

# I. CAUSANE UITI BAE TUPARRÜ AUQUI MAÜBO

## Capítulo 1

*Arnti Bae Tuparrü isamutenti cürrü*  
(*Génesis 1*)

Numo aübo aisamunenti Bae Tuparrü cürrü y napese. Champürrtü anentarrü, pururrü tomiqianene y turrü. Auqui nanti Bae Tuparrü:

--Tari ane nanentarrü.

Auqui ane nanentarrü. Auqui nantito:

--Arrüna nanentarrü iñana üribo nanenese. Tapü arrüna tomiqianene iñana üribo tobirri.

Tonehio arrüba omirriante uiti Bae Tuparrü au taman nanenese.

Au quiatarrü nanenese süro peese uiti turrü, nauqui ane napese y cüsaüboca. Auqui tabe torrü naneneca yatrabacacarri.

Au quiatarrü nanenese süro peese uiti turrü pünanaqui cürrü. Masamunutito borrhü y aruqui nanaiña nasusüca, sueca aübu. niyopüsirri y nobütarrü. Auqui tabe trerrü naneneca.

Au quiatarrü nanenese aisamunenti surrü, na acua au nanenese, y panrrü y nostoñeca, na aucua au tobirri. Auqui tabe cuatro naneneca.

Au quiatarrü nanenese aisamumentifño  
nopiococa, y arrüba bosüborico eana turrü.  
Nanti Bae Tuparrü ñome:

--Amecosi au nanaiñantai cauta abe tuca,  
abaübosi na aububiquia.

Masamunutito nutaumanca y arrüba  
bupasoro. Nantito ñome:

--Abaübosi na aububiquia.

Auqui tabe cinco naneneca.

Au quiatarrü nanenese aisamunentiño  
aruqui nanaiña numuquianca, arrüba  
bosüborico icu na cürrü, vacaca, nobirraca,  
nupaucheca, tamococa, nuitümüca,  
noirro boca, aruqui nanaiñantai numuquianca.  
Nanaiña arrüba omirriante uiti, pururrü ui  
nurarrtiatai. Auqui asaratiño arrüba  
omirriante uiti, bien omirriantai au  
ñaquioncorrti.

## Capítulo 2

*Arrti Bae Tuparrü masamunuti tamanti  
ñoñünrrü y taman paürrü  
(Génesis 1 y 2)*

Nauquiche maübo urriancati ñoñünrrü uiti  
Bae Tuparrü. Urriancati uiti tacana  
nacarrti. Urriancati uiti ui taurrü.  
Aisucüti Bae Tuparrü au niñarrti. Auqui  
süboricoti maniqui ñoñünrrü uiti Bae  
Tuparrü. Aiñanti üriboti Adán. Nauquiche  
tanancati Adán süboricoti, aiñanatiti Bae  
Tuparrü au manu bertarrü sürümanarrü, cauta  
abe sürümana plantaca, nauqui acuirati  
yutacu utuburiboti.

Abe ito aruqui nanaiña numuquianca.  
Chücüpüropü turrü au manu sapoco ane  
cümüinta manu bertarrü.

Manu bertarrü nürirri Edén. Artti  
Adán coñorrtai ümoti acamanu. Bacuirarati  
nurria itacu nanaiña arrüba abe taha isiu  
yacüpurrti Bae Tuparrü.

Auqui artti Bae Tuparrü icüpurutiti  
Adán aiñanatiño nobüri nanaiña  
numuquianca. Auqui numo tanaiña obürio  
uiti.

Auqui nanti Bae Tuparrü:

--Artti naqui ñoñünrrü ane nüriacarrti  
ñome nanaiña numuquianca.

Nantito:

--Canapae churriampü arrtü cunauntañanti  
naqui ñoñünrrü, mejor masamuna  
icumpañerutubuti.

Auqui artti Bae Tuparrü ipianumucunuti  
nurria Adán. Nauquiche tümanumuti nurria,  
aiquiaübuti Bae Tuparrü taman nipeirrti, na

aisamunenti taman paürrü. Urriante uiti auqui nipeirrti Adán. Numo turriante manu paürrü, auqui arrtopüti tato Adán. Asaratitü ümo, ananca atürai, pucünuñati icuata.

Auqui nanti Adán:

--Ane caüma isumpañerubuñü, itopiqui arrüna urriante auqui niñañetu.

Tone nisamucurrti Bae Tuparrü ümoti Adán.

Sane nauquiche auqui na tiemporrü ñana arrübama mayaüca onconoma uimia yaütorrüma, nauqui avivimia aübu nicüpostorrüma. Arrümanuma torrü iñanamacü tacana taman nacarrüma.

Arri ñoñünrrü ichepe paürrü amoncoma cüsuasama. Champü naibirrimia, pero champü ito nicüsorrüma. Auqui aiñanti Adán üribo manu paürrü Eva. Nanti Bae Tuparrü ümoma:

--Abaübosi na aboma sürümanama macrirrtianuca amocütüpüqui, na ata uimia nanaiña cürrü. Arraño iñata abüriacabo manrrü omopünanaqui nanaiña numuquianca icu na cürrü. Nanaiña nobüta ba sueca iñata amutuburibo, y umutuburibo nanaiña numuquianca ito.

Auqui asaratitü Bae Tuparrü ümo nanaiña  
arrüba omirriante uiti bien omirriantai.  
Pucünuñati yucuata. Auqui tabe seirri  
naneneca.

Tacürusu yatrabacacarri.  
Chübatrabacaratiquipü. Nauquiche  
niyücürüpü ümo siete naneneca arri Bae  
Tuparrü macansarati. Curusüo uiti manu  
nanenese nesa macansacarrü.

### Capítulo 3

*Arri Adán y Eva isamutema nomünantü  
(Génesis 3)*

Nauquiche numo aübo na cürrü, champü nomünantü uiti Adán y ui Eva. Aboma uiti Bae Tuparrü au manu bertarrü, nürirri Edén. Arrümanu bertarrü coñorratai. Nanti Bae Tuparrü ümoma:

--Puerurrü auba nobüta ba sueca. Tapü nüta manu taman suese auqui cümünta, tapü aumate, itopiqui arrtü aumate auconca.

Taman nanenese aiñanai manu taman noirroborrhü esa Eva au manu bertarrü. Manu noirroborrhü tarucu ñatachemacacarrü. Ñanquitio pünanaqui Eva, nantü:

--¿Aensapü sane nurarri Bae Tuparrü, tapü aubaca nobüta manio sueca?

Aiñumu Eva:

--Puerurrü suba nobüta nanaiña sueca.  
Tapü nüta manu taman suese auqui cümüinta,  
ta chüpuerurrüpü sumane. Itopiqui arrtü  
supacaca na sumane suisonca.

Aiñumu noirroborrü:

--Chauconcapü. Arrtü aumate nüta manu  
suese auqui cümüinta, ta iyebo aboi tacana  
nacarrti Bae Tuparrü. Nanaiña tusio aume  
arrüba nomirria y arrüba nomünantü icu na  
cürrü.

Auqui asaratü Eva ümo nüta manu suese,  
coñorratai au ñaquiioncorrü. Auqui macana  
taman nauqui ane. Ache ito ümoti iquiana.  
Basotito uirri. Nauquiche tübasoma nüta  
manu suese, auqui tusio ümoma ta cüsuasama.  
Cüsoboma y birrubuma ito. Sane nauquiche  
apachema nasusüca, arrüba bupacubaesa,  
aibiboma.